

Buka ladang, balak punca banjir di Pantai Timur

Kuala Lumpur: Hakisan dan pembersihan tanah bagi aktiviti perladangan, penempatan dan pembalakan serta kadar hujan yang luar biasa, menjadi faktor utama banjir besar di Pantai Timur khususnya di Kelantan.

Ketua Kluster, Alam Sekitar dan Sumber Asli, Majlis Profesor Negara (MPN), Datuk Ibrahim Komoo, berkata banjir yang melanda Pantai Timur baru-baru ini adalah bencana alam yang serius

dan luar biasa.

Katanya, ketinggian air yang luar biasa dipercayai berpunca daripada kandungan lumpur dan sisa kayu-kayan serta tumbuhan sangat tinggi menjadikannya sebagai kuasa pemusnah yang cukup besar.

Kuasa hakis yang tinggi

Di Cameron Highlands, ketika hujan lebat, berlaku tanah runtuh dan aliran sisa kayu-kayan dan tumbuhan.



Ibrahim Komoo

“Ini menyebabkan ia berkelodak, pasir dan kelikir serta tumpahan diangkut ke dalam sungai yang mengakibatkan banjir sisa itu atau lumpur. Ia menyebabkan kuasa menghakis dan memusnah yang tinggi.

“Di Sungai Kelantan, kemungkinan terjadi tanah runtuh dan aliran sisa ketika hujan lebat yang menyebabkan kelodak serta sisa sangat banyak dalam sungai, lalu mewujudkan kuasa pemusnah ke-

tika banjir besar.

“Kenaikan air yang pantas dan kerosakan besar mungkin disebabkan gabungan curahan hujan tinggi dan proses aliran sisa atau lumpur,” katanya ketika dihubungi, semalam.

Ibrahim berkata, pembangunan di kawasan rizab sungai ataupun dataran banjir juga menyumbang kepada kejadian banjir besar walaupun proses mendalamkan sungai dilakukan.